

**B. Miličić. Bibliografija radova
saradnika Instituta za istoriju u
Sarajevu : 1959-1999. Sarajevo :
Institut za istoriju, 2000.**

Druga knjiga "Bibliografija radova saradnika Instituta za istoriju u Sarajevu 1959-1999" autora dr. Budimira Miličića, naučnog savjetnika u Institutu za istoriju, na 546 stranica, u tiražu od samo 300 primjeraka, predstavlja skoro bismo mogli reći remek djelo ove vrste knjiga. Naime, cjelovite bibliografije su dosta rijetke u nas, a pogotovo ovako akribično pripremljene sa minucioznim istraživanjem i provjeravanjem i uvrštavanjem u knjigu svakog relevantnog podatka za svaku bibliografsku jedinicu. Samo autor sa takvom savjesnošću i ozbiljnošću pristupa poslu kakav je gospodin dr. Budimir Miličić mogao je ovako besprijekorno uraditi ovaj veoma zahtjevnji posao. Da bi se valjano uradio ovaj mukotrpan posao trebalo je pregledati i istražiti 395 publikacija među kojima su 54 monografske studije, dva sintetska djela, dvanaest publikacija izvora, tri hronologije, četiri bibliografije, 43 posebna izdanja, 121 zbornik radova sa naučnih skupova, osam zbornika članaka, 80 jugoslovenskih i stranih časopisa, tri almanaha, 49 naslova dnevne, periodične i revijalne štampe i šesnaest bibliografskih priloga. Ovome treba dodati još 26 rukopisa neobjavljenih monografija i bibliografija. Ovako impresivan trud urodio je plodom i sačinjena je bibliografija sa 2611 bibliografskih jedinica bez 250 priloga memoarskog karaktera. Ovako bogatu žetvu rezultata rada saradnika Instituta za istoriju, autor je mogao poženeti zato što je Institut za istoriju u Sarajevu, uoči sloma socijalističkog sistema i raspada bivše države na pet nezavisnih država, bio ustanova sa najvećom koncentracijom naučnog kadra historijske struke u Bosni i Hercegovini. U Institutu je tada radilo dvanaest doktora historije, osam magistara i četiri postdiplomca. Ovaj kadar se, nažalost, drastično osuo u minulom četverogodišnjem ratu, odnosno agresiji na našu zemlju, tako da je krajem 1999. godine u Institutu još radilo četiri doktora nauka, pet magistara i jedan postdiplomac.

Bibliografija o kojoj govorimo potvrđuje da je Institut u Sarajevu u protekle četiri decenije djelovanja izrastao u snažno žarište stvaralačke misli i dao nesumnjiv naučni doprinos opštem napretku i

zamahu historiografije u Bosni i Hercegovini. Od svih radova saradnika Instituta uvrštenih u Bibliografiju 91% ih je štampano u Bosni i Hercegovini, 120 u Srbiji, 48 u Hrvatskoj, 11 u Sloveniji, 8 u Crnoj Gori, 5 u Makedoniji i 27 u inostranim izdanjima. Od ukupnog broja naučnih, teoretskih i publicističkih radova, publikacija izvora, hronologija i bibliografija tematski se svega 11 odnosi na prahistorijsko i antičko doba, 116 na rani srednji vijek, 255 na osmansko-tursko razdoblje, 275 na austro-ugarski period, 422 na period Kraljevine Jugoslavije, 515 na drugi svjetski rat, 144 na socijalističku epohu, 64 na postsocijalističko vrijeme. Najveći broj radova je posvećen temama iz političke historije u okviru kojih se dosta često uz put obrađuju i pitanja iz oblasti ustavnopravne, privredne, demografske, etnografske, zdravstvene, socijalne i kulturne tematike. Od ukupno 1814 naučnih, publicističkih i stručnih radova kod njih 66 je glavni predmet obrade opšta problematika države i društva, 67 etničko i nacionalno pitanje, 76 religija, 77 demografske prilike, 28 ekonomsko-socijalni odnosi, 92 privreda, 239 prosvjeta, nauka i kultura, 493 radnička klasa, 30 seljaštvo i agrar, 47 nacionalnooslobodilački i socijalni pokreti i borba, 236 ratni događaji, 81 sistem revolucionarne vlasti 1941-1945, 17 antifašističke organizacije, 236 šira politička tematika i 11 ostale teme.

Zbog lakšeg korištenja i bolje preglednosti, bibliografska građa je klasificirana u tri osnovne grupe: A. Izdanja Instituta i publikacije izdate uz učešće i saradnju instituta, B. Radovi stalnih saradnika Instituta za istoriju u Sarajevu i C. Radovi spoljnih saradnika Instituta. Svaka od ovih triju velikih grupa podijeljena je na nekoliko podgrupa. Tako se u prvoj grupi nalaze 4 pododjeljka, u drugoj 17, a u trećoj 13 podtema.

Mislimo da je osnovna namjena Bibliografije da stručnjake valjano obavijesti o radovima neophodnim za njihov rad u potpunosti i ispunjena i da će ova bibliografija dugi niz godina biti nezaobilazan priručnik svima onima koji hoće da se bave historijom i historijskom naukom.

Dr. Ahmed Hadžirović